

ՏՆՏԵՍԱԳԻՏԱԿԱՆ ՄԻՏՔԸ ԴԱՐԱՍԱԳՐԻ «ՄՇԱԿԻՄ»

ՌՈՐԵՐՏ ՍԱՐԴՅԱՆ

Գրիգոր Արծրունու մահով ավարտվում է «դասական» «Մշակի» ժամանակաշրջանը։ Անցյալ դարի 90-ական թվականներին դեռևս շարունակվում էր նախորդ տասնամյակների ինքնուրույն կենսունակ պահելու տնտեսական զարգացման հարցերի վերաբերյալ թերթի ավանդները, «հասարակաշինություն» նրա դավանած ծրագիրը։ Իսկ արդեն 1900-ական թվականներին «Մշակի» համար սկսվում է մի նոր շրջափուլ։ Եթե նախորդ ժամանակաշրջանի «Մշակին» բնորոշ էին հասարակական կյանքի «տնտեսական կետից» կատարվող վերլուծությունները, ինչպես կոնկրետ տնտեսական, այնպես էլ տեսական հարցերի վերաբերյալ հետազոտությունները, ապա դարասկզբին, կապված պատմական իրադարձությունների շրջաբեկման հետ, թերթը գերազանցապես ուշադրություն էր սեռում սոցիալ-քաղաքական անցուղարձի խնդիրների վրա։ Հասարակական զարգացման «բարենորոգչական» այն պրակտիկ ծրագրերը, որ առաջադրում էր «Մշակը» 1870-ական թվականներից և որոնք հանգամանորեն լուսաբանված են հրապարակի վրա եղած աշխատություններում, այս կամ այն ձևով կրկնում էր նաև դարասկզբին։ Տվյալ դեպքում մեզ ավելի շատ հետաքրքրում են տնտեսագիտական հարցերի վերաբերյալ այն տեսական արժարժումները, որ կատարվել են 1900-ական թվականների «Մշակում»։

Դարասկիզբը հասարակության տնտեսական ու սոցիալական զարգացման նոր որոնումների ժամանակաշրջան էր։ Ինչպես և մեկ դար առաջ՝ հասարակական հայեցողության առաջ ծառանում են բազմաթիվ նոր անհայտներ, նոր պատրանքներ՝ կապվելով XX դարի հետ, ակնկալվում նոր սպասումներ հասարակության կենտրոն հարցերի լուծման ասպարեզում։ «Տանջված մարդկության համար վերջին տասնիններորդ դարը, — գրում է «Մշակը», — նշանավոր է նրանով, որ նա բացեց ապագա ուրախությունների մեծ հեռանկարներ։ Իրականությունը դեռ քիչ է փոխված, բայց նա մոտեցրած էր մի շավղի, որ տանում է դեպի երազների և ոսկե հույսերի իրագործությունը։ Առաջիկա քսաներորդ դարը, որի մեջ մտնում ենք այսօր, պետք է պատասխան տա մեր հասարակական հարցերին և լուծե մի շարք գորդյան հանգույցներ»¹։ Սակայն հասարակական նորոգության «Մշակի» հայեցողությունը նոր բան չէր ենթադրում։ Ու թեև «իդեալական հասարակարգի» գաղափարը համարվում էր անիրագործելի և մի ինչ որ տեղ նույնիսկ անընդունելի, այնուամենայնիվ, աստիճանական կատարելագործությունն այն միակ ուղին էր, իսկ XX դարը հասարակության պատմության այն պատմադարաններից մեկը, որի ձգնաճակն էր նախադրել պիտի բարձրանա մի նոր, ավելի բարձր գաղաթի վրա, որից ավելի պայծառ երևա իդեալի ուղեցույց լույսը»²։

Եվ ահա թերթի հեղինակներից Մ. Հ.-ն մտորումներ է անում հասարակական առաջընթացի, քաղաքակրթության ու գիտության առաջադրած, բայց և նրա կարծիքով ըստ էության անպատասխան մնացած հարցերի վերաբերյալ։ «Գիտությունը և փիլիսոփայությունը, չնայած իրանց հրաշալի ընդհանրացումներին, — գրում է նա, — անկարող եղան պատասխանել մետաֆիզիկայի դրած հարցերին՝ ինչ է տիեզերքը, նրա պատճառը, նրա նպատակը... ուր է տանում պրոգրեսը, ուր է արդյոք այն «գերագույն երջանկությունը», որ այնքան խան-

¹ «Մշակ», 1901, № 1:

² Նույն տեղում:

դավառությունը հռչակել են բարոյագետ փիլիսոփաները անհիշատակ ժամանակներին³։ Անցած պատմաշրջանների տնտեսական, փիլիսոփայական ու սոցիալական ուսմունքներից յուրաքանչյուրը առաջադրում էր իր համակարգը հասարակական ներհակությունների լուծման ուղղությամբ։ Սակայն «Մշակի» հեղինակի կարծիքով, դրանք բոլորն էլ ունեցել են միագիծ բովանդակություն և իրենց էությունը հոռետեսական են ճեղքանկության առեղծվածի» հարցերում։ Նա քննադատում է Ժ. Ժ. Ռուսոյի հասարակության բնական վիճակի» վերաբերյալ տեսությունը, որի ժամանակ իբր մարդկանց միջև տիրել է համերաշխություն ու ներդաշնակություն, որ շնայած նրա հասարակական դաշինքի» հրատարակումից անցել է մեկ ու կես դար, սակայն ոչ միայն թուլացել է Թ. Հորսի հռչակված «բոլորի պատերազմը բոլորի դեմ» սկզբունքը, այլև ճշգրիտ բռնակալությունը փոխարինվեց կապիտալի բռնակալությամբ։ Գոյության կռիվը ստացավ ավելի ուժ և տենդոտ կերպարանք⁴։ Բարոյագիտությունը առաջադիմեց, միջին դարերի աստվածաբանությունը փոխարինեց է. Կանտի ռացիոնալիզմը, աստվածային սանկցիան տեղի տվեց մարդկային գերագույն ու անկախ բանականության սանկցիային», «մշակվեցին անթիվ անհամար կատեգորիաներ», որոնք նպատակ ունեին հասարակական հարաբերությունների բարոյական կատարելագործման միջոցով հաղթահարելու «սանձարձակ ճես»-ի պաշտամունքը⁵։ Հասարակության տնտեսական ու սոցիալական ներհակությունները ոչ միայն չթուլացան, այլև նոր տնտեսակարգի հաղթանակով ավելի խորացան։ Դասակարգային հակասություններն առավել ցայտուն արտահայտվեցին Անգլիայում, որն էլ ավելի խորացավ խոշոր մեքենայական արտադրության հաղթանակով։

Ինչպես հայտնի է, անգլիական դասական տնտեսագիտության կամ «ազատ դարոցի» ներկայացուցիչները, ելնելով անհատականության սկզբունքից և ժխտելով ամեն մի օրենսդրական միջամտություն, կարծում էին, թե եկել է բանական թագավորության» ժամանակաշրջանը և իբր տնտեսական կյանքում կատարյալ ազատությունն ինքնաբերաբար կլուծի դասակարգային, տնտեսական ու սոցիալական առկա հակամարտությունները։ Անտարակույս, տնտեսական առաջադիմության առումով քաղաքականության նվաճումներն անառարկելի էին, սակայն հասարակությունը տրոհվեց երկու հակամարտ դասակարգերի. «միջնադարյան ֆեոդալական կաշկանդումները չկային այլևս. ազատ էր անհատը։ Ազատ՝ ապրելու, բայց և ազատ՝ մեռնելու. եթե նա ունի բավականաչափ նյութական ուժ ու տոկոսություն կարող է ապրել ու հարատևել, իսկ եթե միայն իր ողորմելի մկանների տերն է՝ վաղ, թե ուշ կկորչի կյանքի հորձանուտում» համալրելով Վոլտոնի պահանջային բանակի» շարքերը⁶։ Այսպիսով, նորից «ուժեղագույնների, հարմարվողների հարատևություն»⁷, մի սկզբունք, որն իր տեսական հիմնավորումն է ստացել Զ. Դարվինի և Հ. Սպենսերի աշխատություններում։ Ակներև է այն միակողմանի մոտեցումը, որ ցուցաբերում է հեղինակը մարդկային հասարակարգի ու բնության զարգացման օրենքների հանդեպ։ Սակայն հեղինակի խոսքը վերաբերում է սոցիալ-դարվինիզմի գոյության կռիվ օրենքին, որպես կենդանական ու հասարակական կյանքի ունիվերսալ օրենքի։ Ֆ. էնգելսը Պ. Լավրովին գրած նամակներից մեկում նկատում է, որ գոյության կռիվ բանաձևը «նույնիսկ բնության մեջ միայն խիստ պայմանականորեն կարող է ընդունվել», իսկ եթե հասարակության համար մի վայրկյան ուժի մեջ թողնենք այդ կատեգորիան, — այսպիսով, <այն> դառնում է կռիվ հաճույքների համար, կռիվ ոչ միայն գոյության միջոցների, այլև զարգացման միջոցների համար, իսկ այդ աստիճանի նկատ-

3 Նույն տեղում, 1902, № 97։

4 Նույն տեղում։

5 Նույն տեղում։

6 Նույն տեղում։

7 Նույն տեղում։

մամբ կենդանիների աշխարհի կատեգորիաները արդեն չեն կարող կիրառվել: ...ի միջի այլոց, բավական է պատմության նախորդ ընթացքը դիտել որպես դասակարգային ճակատամարտերի անընդհատ շարք, որպեսզի պարզ դառնա այդ պատմության այն ըմբռնման ամբողջ մակերեսայնությունը, թե իբր պատմությունը «գոյություն կույի» արտահայտությունների աննշան վարիացիա է ներկայացնում: Ուստի ես երբեք այդպիսի զիջում չեի անի այդ կեղծ նատուրալիստներին»⁸:

«Մշակի» հեղինակի կարծիքով պեսիմիստ էր նաև Լ. Տոլստոյը՝ «տոգորված քրիստոնեական կրոնի հիմնական, համամարդկային սկզբունքներով», որը կույի ու բիրտ ուժի փոխարեն սեր էր քարոզում, կարծելով թե, եթե մարդկանց կյանքի ու գործունեության հիմքում դրվեն ինչ-ինչ բարոյական սկզբունքներ, ապա հնարավոր կդառնա հասարակական զարգացումը տանելու դեպի բնական ու արդարացի կարգերի⁹: Նույն դիտակետից «Մշակի» մի այլ հեղինակ՝ Ն. Ազատը, XVIII դարի փիլիսոփաների և Լ. Տոլստոյի հայացքների տարբերությունը տեսնում էր այն բանում, որ եթե առաջինները հավասարության վերաբերյալ իրենց «դեզատոմսերն առաջարկում էին թագավորներին», ապա ռուս մտածողին թվում էր, թե «առանց օրենքների օգնության էլ բավական է միայն, որ մարդիկ ընդունեն իր խրատներն ու քարոզները և սրանց համաձայն կարգավորեն իրենց մասնավոր ու անհատական կյանքը»¹⁰: «Այդպես են բոլոր ուտոպիստները, — եզրակացնում է Մ. Հ.-ն, — կյանքի հսկայական պրոբլեմը պատկերանում է նրանց չափազանց պարզ, անպաճույճ և նրանք զրլի մի ուժգին հարվածով խիզախում են տալ նրա լուծումը: Ուտոպիստ էր Ռուսոն, որ իր սրտաշարժ միամտության մեջ կարծում էր tabula rasa անել հազարավոր տարիների կուլտուրական պրոցեսը և ետ շրջել մարդկությունը դեպի նախնական, առերևույթ «երջանիկ», բայց իրոք վայրենի և արհավրալից շրջանը: Ուտոպիստ էր Կարլայլը, որը XX դարի շեմքում ուզում էր ետ կանչել վաղուց արդեն հաղթահարված կաստային ֆեոդալականության ուրվականը: Ուտոպիստ էին Նիցշեն և Շտրիները, որոնք ուզում էին առաջինը համարել միջնադարից հետո հսկա պրոգրեսը և հավակնած էին վայրագ էգոիզմի թագավորություն հիմնել ժամանակակից կարգերի փլատակների վրա: Ուտոպիստ էր Տոլստոյը, որը հավատում էր իր քարոզների ամենակարող ուժին»¹¹: Հասարակական ուսմունքների՝ հեղինակի վերլուծությունները բնորոշվում են սահմանափակ ըմբռնումներով: Այն, ինչ իրագործելի չէ, ուրեմն հոռետեսական է: Այդ միակողմանի վերլուծությունը հանգեցնում է նրան, որ մի կողմ է թողնում այդ ուսմունքների ներքին կապերի բացահայտումը՝ դրանց առանձին տարրերը հարմարեցնելով նախապես առաջադրված գրույթի արդարացմանը: Եվ պատահական չէ հոգվածի «Պեսիմիզմը հասարակական գիտության մեջ (երջանկության առեղծվածը)» վերնադիրը: Թերևս դրանով պիտի բացատրվի այն հանգամանքը, որ հեղինակը չտարբերակելով այդ ուսմունքների ներքին ուղղվածությունը, դրանք քննության է ենթարկում մի ընդհանուր դիտակետից, շնչմարելով դրանց ինչպես առաջադիմական, այնպես էլ հետադիմական կողմերը: Եվ այսպես մի ընդհանուր տեսանկյան տակ են դրվում Ժ. Ժ. Ռուսոյի՝ տիրող կարգերի իր բովանդակությամբ դեմոկրատական քննադատությունն ու սոցիալական երազանքի հետադիմական հայեցողությունը, Թ. Կառլայլի պանթեիզմն ու «ֆեոդալական սոցիալիզմը», շնչմարելով վերջինիս ուսմունքում անցյալի ու ներկայի դիալեկտիկայի, բուրժուական Անգլիայի քննադատության հարցերում այն գրականը, որով նա անսահմանորեն առաջ անցավ իր ժամանակի

⁸ «Լ. Մարքսի և Ֆ. էնգելսի նամակագրությունը ռուս քաղաքական գործիչների հետ», Նրևան, 1954, էջ 274, 276:

⁹ «Մշակ», 1902, № 99:

¹⁰ Նույն տեղում, 1908, № 188:

¹¹ Նույն տեղում, 1902, № 99:

կրթված անգլիացի ինտելիգենտների հայացքներից¹²։ Ֆ. Նիցշեի ու Մ. Շտրո-
նների հոռետեսությունն ու նիհիլիզմը համադրվում է Լ. Տոլստոյի ռեակցիոն-
ուտոպիական իդեաների հետ, վերջինիս ուսմունքի մեջ շատ անհանգստացնելով այն
«քննադատական տարրերը», որոնք ընդունակ են «արժեքավոր նյութ տալու
առաջավոր դասակարգերի լուսավորության համար»¹³։ Այստեղից էլ հեղինա-
կի այն հետևությունը, թե «ռուսներն ու տոլստոյները քաղաքակրթության
սովորալին կողմերն են միայն տեսնում, հուսախաբ ու ցավագին խարազա-
նում են առաջադիմությունը, պրոգրեսը»¹⁴։ Բայց ինչպիսի՞ն պիտի լինի հե-
ղինակի կարծիքով հասարակական առաջընթացը, ի՞նչ օրենքների են ենթա-
կա նրա տնտեսական ու սոցիալական պրոցեսները։ «Հասարակական գիտու-
թյունը, էվոլյուցիոնիզմի դոկտրինից հրահանգված, — գրում է նա, — ուսուցա-
նում է մեզ, որ ժամանակակից մարզը ճակատագրորեն կրում է իր մեջ իր հե-
ռավոր, անասնական նախնիների բնազդումները, որ էգոիզմը նրա էական
հատկանիշն է, որ դաստիարակությունը մեղմում է, անշուշտ, նրա մոլեգնու-
թյունը, սակայն չէ կարողանում իսպառ վերացնել։ Բայց սոցիոլոգիան ուսու-
ցանում է նաև, որ ալտրուիզմը ևս կազմում է և կազմել է միշտ մարդկային
էություն հիմնական ատրիբուտը։ էգոիզմ և ալտրուիզմ, միմյանց՝ կռիվ և ատե-
լուցիական, մյուսը՝ սիրո և համերաշխության սկզբունք՝ թագավորել են ի սկզբ-
բանն իբրև երկու հակոտնյա, բայց և իբրև փոխադարձ լրացումներ։ Եթե ան-
գամ ալտրուիզմը վերջնական քննության մերժվի էգոիզմի՝ դա չէ կարող
այնուամենայնիվ ժխտել երկու հոգեկան բնազդումների ինքնուրույն գոյու-
թյունը»¹⁵։ Հեղինակի վրա միանգամայն ակնհայտ է Ադամ Սմիթի «Բարոյական
զգացմունքների տեսություն» աշխատության ազդեցությունը։ Հայ հեղինակը,
ինչպես դա անում էր Ա. Սմիթը, ելնում էր մարդկանց գործելակերպի բացար-
ձակ, «բնական» օրենքներից, շահականալով, որ էթիկան իր հիմքում որոշվում
է տվյալ հասարակարգի սոցիալ-տնտեսական կարգով։ Սակայն եթե Ա. Սմի-
թը, ժխտելով կրոնական բարոյականությունը և «բնածին բարոյականության
զգացմունքները», դրանց տեղը դնում էր մի այլ վերացական սկզբունք՝ «հա-
մակրության սկզբունքը»¹⁶, ապա «Մշակի» տեսաբանը էգոիզմի սկզբունքը
լրացնում է ալտրուիզմի սկզբունքով։ Այսինքն, նա փորձում է լուծել կապի-
տալիզմի պայմաններում գոյություն ունեցող անլուծելի հակասությունն
էգոիզմի ու ալտրուիզմի միջև, հակասություն, որը կարող է վերացվել միայն
սոցիալական, տնտեսական ու դասակարգային հակամարտությունների վե-
րացման միջոցով։ «Թվում է թե երկու սկզբունքներն էլ հավիտենական են, —
գրում է հեղինակը, — բայց որքան փոխվում են նրանք ժամանակի հոսանքում։
Անժխտելի է, որ քաղաքակրթության պրոգրեսի ընթացքում կռիվի սկզբունքը
աստիճանաբար թուլանում, մարդկայնանում է, այնինչ համերաշխության
փաստը շեղվում է միշտ ավելի ուժեղ և ցայտուն։ Եվ նորագույն հասարակական
գիտությունը սանկցիա է տալիս այդ համերաշխության, որով միայն պիտի
հնարավոր լինի բառնալ տիրող շարիքները, բառնալ կռիվի սկզբունքը ընդհան-
րապես և փոխարինել նրան խաղաղ օրինավոր մրցումով»¹⁷։ Ակնհայտ է, որ հե-
ղինակի հայեցողությունը ելակետ ունի «շահերի ներդաշնակության» տեսությու-
նը և իր էությունում ռեֆորմատորական է։ Դավանելով առաջադիմության լիբե-
րալ գաղափարներ, նա կարծում էր, թե էգոիզմն ու ալտրուիզմը հարատև են,
սակայն կապիտալիզմն իր զարգացման ընթացքում, աստիճանական ինքնա-
կատարելագործման միջոցով, առանց հեղափոխական ցնցումների կտանի։

¹² К. Маркс и Ф. Энгельс, Соч., т. 1, с. 589.

¹³ Վ. Ի. Լենին, ԵԼԺ, հ. 20, էջ 124:

¹⁴ «Մշակ», 1902, № 99.

¹⁵ Նույն տեղում:

¹⁶ А. В. А н и к и н, Юность науки, М., 1979, с. 167—168, նույնք տե՛ս Մ. Ն. Ա գ ո ն ց, Հայաստանի ժողովրդական տնտեսությունը և հայ տնտեսագիտական միտքը XX դարի սկզբին, Երևան, 1968, էջ 327:

¹⁷ «Մշակ», 1902, № 99.

մասնավոր արտադրածների պայմաններում այդ երկու հակոտնյա սկզբունքների, փոխադարձ համալրման միջոցով, հասարակական ներհակությունների վերացմանը:

Անդրկովկասի տնտեսական զարգացման համար դարասկզբը բնորոշվում է նոր փոփոխություններով: 1900-ական թվականները երկրամասի համար նշանավորում են տնտեսական զարգացման բուռն ու ինտենսիվ շրջափուլի սկիզբը՝ տնտեսագիտական միտքն զբաղեցնելով նոր արժարժեքներով:

Տնտեսագիտության տեսությունը երկրների միջև առևտրի քաղաքականության բնագավառում տարբերակում է երկու ուղղություն՝ պրոտեկցիոնիզմի կամ հովանավորական և ազատ առևտրի կամ ֆրիտրիդերականության քաղաքականությունը: Ելնելով զարգացման առանձնահատկություններից՝ երկրները կիրառում են այս կամ այն քաղաքականությունը: Անգլիան առաջինը դիմեց ազատ առևտրի քաղաքականությանը: Արդյունաբերական հեղաշրջումը եվրոպական մայրցամաքի մյուս երկրներում շատ ավելի ուշ կատարվեց, քան Անգլիայում: Արտադրողական ուժերի զարգացման աստիճանով Անգլիան անհամեմատ բարձր էր կապիտալիստական մյուս երկրներից, իսկ դա այն նյութական հիմքն է, որը նրան դրեց ամեն մի մրցակցությունից դուրս վիճակում, տուժելով հոսանքներով անսահմանափակ ազատության սկզբունքը և հետևելով դրան մինչև XIX դ. վերջը: «Մշակի» հեղինակ Սարուխանը նշում է այն մեծ դերը, որ խաղացել են տնտեսագետներ Կոբզենը, Ռ. Միլը և Զ. Բրայթը՝ Անգլիայում ազատ առևտրի սկզբունքների առաջադրման ու տեսական հիմնավորման գործում: Նրա կարծիքով Անգլիա ներմուծվող ապրանքների վրա մաքսերից վերացումը պայմանավորված էր այն բանով, որ «Անգլիան երկրագործության և գյուղատնտեսության համար հարմար երկիր չէ: Նրա... արդյունաբերությունը ժողովրդի հազիվ $\frac{1}{3}$ մասը կարող է կերակրել, ուրեմն եթե դրսից բերված հացահատիկների, յուղի, մսի և այլ գյուղատնտեսական արդյունքների վրա մաքս դրվի, ապրուստի գինը պիտի բարձրանա, որը պիտի ազդե գլխավորաբար հասարակ ժողովրդի և բանվոր դասակարգի վրա, որոնք այդ թանկության պատճառով կամ լավ սնունդ պիտի չկարենան ունենալ և կամ իրանք էլ բարձր օրավարձ պիտի պահանջեն գործարանատերերից»¹⁸: Իսկ որքանով Անգլիան, շարունակում է հեղինակը, իր գործարանների համար անհրաժեշտ հումքը ներմուծում է այլ երկրներից, ուստի մաքսեր սահմանելու դեպքում կրնան նրա մյուս երկրների հետ հայրենական գործարանատերերի մրցուցակությունը՝ դժվարացնելով ապրանքների արտահանությունը: Սակայն Անգլիայի վարած տնտեսական այդ քաղաքականությունը տնտեսական, դասակարգային ու քաղաքական ավելի խոր շահեր էր ակնկալում, քան ենթադրում է «Մշակի» հեղինակը: Իր էությունով դա ոչ միայն տնտեսական մասնակի խնդրի շուրջ կատարվող պայքար էր, այլ տասնամյակներ շարունակվող տարբեր դասակարգերի տնտեսական շահերի պայքար: Եվ արդեն 1840-ական թվականների կեսերին Անգլիան վերջնականապես անցնում է ազատ առևտրի սկզբունքին, դրան հետևելով մինչև դարավերջը: Արտաքուստ դա մի ակտ էր, որից շահում էին նաև Անգլիայի գործընկերները, որոնք նրանից ստանում էին սարքավորումներ: Սակայն իրականում Անգլիան տնտեսական զարգացման շնորհիվ իր համար ստեղծել էր առավել բարենպաստ պայմաններ, քանի որ մի կողմից ապահովել էր իր արտադրանքի իրացումն արտաքին շուկայում, իսկ մյուս կողմից՝ էժանագին հումքի ու մթերքների ներմուծումը¹⁹: Այնուամենայնիվ, համաշխարհային կապիտալիստական տնտեսության մեջ Անգլիայի մենաշնորհը աստիճանաբար սկսում է նվազել և մի շարք երկրներ արդեն դարձնում են մաքսային քաղաքականությամբ հովանավորում էին հայրենական արդյունաբերության զարգացումն ու պաշտպանվում անգլիական մրցակցու-

¹⁸ Նույն տեղում, 1909, № 131:

¹⁹ Հանգամանքներն տե՛ս «Экономическая история капиталистических стран», М., 1973, с. 128—132.

թյունից: Այդ երկրներին էր Գերմանիան: Երկրի տնտեսական քաղաքականության հարցերին անդրադարձել են Գ. Շմոլերը, Լ. Բրենտանոն, Ա. Վադները, Ա. Շեֆլեն և շատ ուրիշներ: Տարրեր առիթներով անդրադառնալով այդ տեսակետներին, «Մշակը» չի որոշակիացնում իր կարծիքը, ըստ էության ընդունելով Գերմանիայում այդ հարցի վերաբերյալ եղած մտայնությունը:

Հարկ է նկատել, որ «Մշակն» ընդհանրապես ոչ միշտ է դրվատում պրոտեկցիոնիզմի քաղաքականությունը: «Ամեն անգամ, երբ մի որևէ արհեստ սկսում է անհաջողությունների հանդիպել,— գրում էր թերթը,— այդ արհեստի ներկայացուցիչները, փոխանակ կատարելագործությունների մասին մտածելու և մրցության ուրիշ միջոցներ մշակելու, դիմում են կառավարությանը՝ խնդրելով արտոնություններ իրենց համար: Նրանք խնդրում են, օրինակ, մաքս դնել ներմուծվող ապրանքների վրա և այդպիսով արհեստական կերպով բարձրացնել գները շուկայում, կամ պահանջում են, որ իրենց արդյունագործության զարգացման համար մաքսի ենթարկվեն այն հում նյութերը, որոնք արտահանվում են դեպի օտար երկրներ, և այդպիսով ուրեմն արհեստականորեն էժանացվեն նրանց արդյունագործության համար կարևոր նյութերը»²⁰: Հեղինակի ակնարկը վերաբերում է Ռուսաստանի տնտեսական քաղաքականությանը: Մինչև անցյալ դարի 70-ական թվականները Ռուսաստանի արդյունաբերությունն ապահովված չէր արտասահմանյան մրցակցությունից և, ըստ էության, ցածր մաքսերը ենթադրում էին արտաքին առևտրում ազատ քաղաքականություն: 1870-ական թվականներից ռուսական պետությունը սկսեց ձեռնադրել մի շարք մաքսային միջոցառումներ, որոնք նպատակ ունեին հովանավորելու հայրենական արդյունաբերության զարգացումը: «Մշակը» մի անգամ չէ, որ անդրադարձել է Ռուսաստանում իրականացվող այդ հովանավորական քաղաքականության մանրամասներին ու նպատակներին, նշելով, որ բարձր մաքսերից տուժում են միայն սպառողները²¹: Ինչպես վերը նկատեցինք, թերթը նորից է շեշտում այն հանգամանքը, որ հայրենական արդյունաբերության հովանավորումն ակնկալող մաքսերի բարձրացման հետևանքով գների աճը մեծ եկամուտներ է բերում արդյունաբերողներին և հաճախ կորցնում խթանիչ դերը արտադրության կատարելագործման բնագավառում: Թերթը գրում էր, որ անհրաժեշտ է ամեն կերպ խուլընդոտել հում նյութերի արտահանությունը, քանի որ «մենք ծախում ենք մեր հում նյութերը ուրիշներին և հետո նույնը գնում ենք մշակված և ավելի ևս թանկացած»²²: Տեղում մշակելու տնտեսական օգուտն ավելի մեծ է, որին հասնելու համար անհրաժեշտ են երկու հիմնական պայմաններ՝ զարգացնել մեր մեջ տեխնիկայի կատարելագործությունը, իսկ մյուս կողմից ուժեղացնել մեր ազգաբնակչության սպառող ընդունակությունը և ներքին շուկայի պահանջները լրացնելուց հետո միայն ավելցուկը արտահանել արտաքին շուկա²³: Ակնհերթ է, որ եթե մի կողմից նման հայեցակետն ընդհանրություններ է հայտաբերում մերկանտիլիզմի հետ, ըստ որի սեփական հումքից պատրաստած արդյունքի ներմուծումը հանգեցնում է երկրի աղքատացմանը, ապա մյուս կողմից փորձ է արվում. արտաքին տնտեսական կապերը ղեկեղինքի նման շրջագծի մեջ և ապահովել արդյունքի իրացումը հիմնականում տեղական շուկայի սահմաններում: Եվ դա այն դեպքում, երբ Անդրկովկասն արդեն վաղուց ներդրավ ինչ էր համաշխարհային ապրանքային շրջանառության ոլորտում: Հեղինակը չի նկատում, որ դրանում գրեթե ամբողջովին է կապիտալիզմի օրինաչափություններից մեկը, որ, ինչպես նշում է Վ. Ի. Լենինը, «արտաքին շուկան անհրաժեշտ է այն պատճառով, որ կապիտալիստական արտադրությանը ներ-

²⁰ Նույն տեղում, 1901, № 82:

²¹ Նույն տեղում, 1898, № 33:

²² Նույն տեղում, 1901, № 249:

²³ Նույն տեղում:

հատուկ է անսահմանորեն ընդարձակվելու ձգտումը, ի հակադրություն արտադրության բոլոր հին եղանակներին»²⁴:

1900-ական թվականների սկզբներին Ռուսաստանի տնտեսական կյանքը բնորոշվում է նոր իրողություններով: Սկսվում է նոր տնտեսական ճգնաժամ: Այն տնտեսական խոր հետևանքներ ունեցավ նաև Անդրկովկասի մի շարք առաջավոր ճյուղերի և հատկապես նավթարդյունաբերության վրա: «Մշակի» տեսարաններից Ֆ. Մարդանյանը նկատում է, որ ճգնաժամի հետևանքով նավթի գները սաստիկ ընկել են, սնանկացել են հսկայական թվով մանր ու միջակ ձեռնարկություններ, հակառակ 1890-ական թվականների բարձր գների և զարգացման տեմպերի: Նրան թվում էր, թե շրջանառության ոլորտի կարգավորման միջոցով կարելի է խուսափել տնտեսական ճգնաժամներից: Վերջիններս կապելով նախորդ տարիների դների բարձր մակարդակի հետ, նա առաջարկում էր շատ բարձր գներ շնչանակել, զորովհետև նավթային արդյունաբերությունը կանոնավոր զարգացած արդյունաբերությունների շարքում չէ կարելի դասել. նա զարգացել է հսկայական թոփքներով, իսկ այդ տեսակ զարգացող արդյունաբերությունները միշտ ենթակա են լինում ճգնաժամների... պետք է բռնել միջին ճանապարհ», և որ ճգնաժամը «հետևանք է ընդհանուր արդյունաբերական և դրամական ճգնաժամի»²⁵: Ծգնաժամից դուրս գալու համար «Մըշակն» առաջարկում էր ամենատարբեր տեսակետներ: Մասնավորապես նըշվում էր, որ անհրաժեշտ են նավթի շտեմարաններ և վարկ՝ «ժամանակավորապես, ամբարված նավթի դիմաց նյութականապես օժանդակություն տալու համար»²⁶: Մի երկրորդ հեղինակ ճգնաժամը կապում էր արտահանման սուղ միջոցների ու արտասահմանում կազմակերպված առևտրի բացակայության հետ²⁷, ոմանք էլ՝ արտադրության և սպառման հակասության փաստի հետ²⁸, իսկ մի այլ կարծիք այն կապում էր «հարստությունների կենտրոնացման» հետ, փորձում էր դրանք կանխել մանր արտադրության վրա խարսխված տնտեսական կարմատավորման միջոցով²⁹ և այլն, և այլն: Կարելի է հանգամանորեն անդրադառնալ տնտեսական ճգնաժամների վերաբերյալ այս տեսակետներից յուրաքանչյուրի տեսական ակունքների բացահայտմանը, սակայն ակներևն այն է, ըստ որի ճգնաժամները հաղթահարելի են կապիտալիստական էկոնոմիկայի այս կամ այն կողմերի կարգավորման միջոցով: Հեղինակների առաջարկած միջոցները կապիտալիստական տնտեսակարգի պատմության ուրեք փորձ ձուլ լեն հաստատվում: Նրանք չնկատեցին, որ ճգնաժամները կապիտալիստական վերարտադրության մշտական ուղեկիցն են և առաջանում են արտադրության հասարակական բնույթի ու արդյունքի մասնավոր կապիտալիստական յուրացման միջև գոյություն ունեցող հակասության հետևանքով:

Սոցիալական հարցի լուծման առումով «Մշակի» 1900-ական թվականների դիտողությունները լիբերալ հոսանքի նախորդ տասնամյակների ուղեգծումների քառակուսուց այն կողմ չէին անցնում: Հարցի լուծման ռեֆորմատորական ուղին մնում էր իրողություն: Այդ էր հետամտում Ե. Թոփչյանի «Սպառողական ընկերություններ» հոդվածաշարը: Հեղինակը փորձում էր ուրվագծել սպառողական ընկերությունների տնտեսական ու սոցիալական ֆունկցիաները: Նա հենց սկզբից ընտրել էր վերլուծության սխալ մեկնակետ, ենթադրելով, թե «գոյության կոիվը մի անվերջ շղթա է, որ իր ետևից քաշում տանում է բոլոր կենդանի արարածներին: Տնտեսական մրցումը մի ուժեղ գործոն է, որ միշտ առաջ է մղում մարդկային կյանքը, որ միշտ պատճառ է դառնում պես-պես

²⁴ Վ. Ի. Լենին, ԵԺԺ, հ. 2, էջ 192:

²⁵ «Մշակ», 1901, № 83:

²⁶ Նույն տեղում, № 132:

²⁷ Նույն տեղում, № 190:

²⁸ Նույն տեղում, № 249:

²⁹ Նույն տեղում, 1902, № 71:

երևույթների»³⁰, իմ գործնական այն առաջադրույթը, որի շրջանակներում Ե. Թոփչյանը փորձում էր մեղմել կապիտալիստական մրցության օրենքը, սպառողական ընկերությունների ստեղծումն էր: Ընդ որում, հեղինակը նույնքան բնական էր դիտում նախնադարյան մարդկանց համատեղ աշխատանքի կոոպերատիվ ձևերը, որքան և սպառողական ընկերությունները կապիտալիզմի ժամանակ, վերջիններս համարելով «համաշխատակցության գաղափարի» բարձրագույն աստիճանը, շնչմարելով դրանց առաջացման կոնկրետ պատմական նախադրյալների, բնույթի ու նպատակների տարբերությունները³¹:

Ե. Թոփչյանը հայ գյուղի տնտեսական քայքայման պատճառները որոնում էր ոչ թե առկա հասարակական հարաբերությունների, «այլ ազգաբնակչության տնտեսական ու կուլտուրական հետամնացության մեջ»³²: Նրա համար որևէ տարբերություն չկար ո՛չ Շ. Ֆուրյեի ֆալանստերների ու Ռ. Օուենի «օրինակելի գաղութի», հասարակության սոցիալիստական վերակառուցման նախագծումների, ո՛չ Գ. Շուլցե-Դելիշի ու Ֆ. Ռալֆայզենի, Շ. Ժիդի ու Լ. Բերտրանի ինքնօգնության հիմունքներով կազմակերպվող արտադրական կոոպերատիվների միջոցով կապիտալիզմի շրջանակներում «սոցիալական ներդաշնակություն» ստեղծելու և բանվորական շարժումը ռեֆորմիզմի ուղին մղելու միտումների միջև:

Մարքսիզմի դասականները բազմիցս շեշտել են կոոպերատիվների միջոցով կապիտալիզմի տնտեսական ու սոցիալական ներհակությունները վերացնելու անհնարինությունը, նշել, որ դրանք, գործելով կապիտալիստական հարաբերությունների շրջանակներում և, ըստ էության, լինելով «կապիտալիստական կոլեկտիվ հաստատություններ»³³, «վերարտադրում են և պետք է վերարտադրեն առկա սիստեմի բոլոր թերությունները»³⁴:

Սրանք են տնտեսագիտական հարցերի վերաբերյալ «Մշակի» տեսական ու գործնական սկզբունքները, որոնք հետաքրքրական են դարասկզբի հայ հասարակական մտայնության բնութագրության տեսակետից:

ЭКОНОМИЧЕСКАЯ МЫСЛЬ «МШАКА» В НАЧАЛЕ ВЕКА

РОБЕРТ САРИНЯН

Р е з ю м е

«Мшак» является одним из тех органов периодической печати, теории которого пытались в параллелях известных экономических, философских и социальных учений выявить тенденции общественного развития. Газета уделяла внимание многим теоретическим проблемам экономической науки, таким, как промышленные кризисы, экономическая политика, социальные противоречия общества и т. д. В рамках либерального и реформистского кругозора теории «Мшака» предлагали различные меры устранения экономических и социальных противоречий.

Несмотря на внутреннюю противоречивость их теоретических воззрений, они представляли большой интерес с точки зрения характеристики армянской общественной мысли начала века.

³⁰ Նույն տեղում, 1903, № 35:

³¹ Նույն տեղում, № 65:

³² Կ. Պ. Կարապյան, Սպառողական կոոպերացիայի ծագումը և զարգացումը Հայաստանում, Երևան, 1957, էջ 53:

³³ Վ. Ի. Լենին, ՍԼԺ, հ. 45, էջ 442:

³⁴ Կ. Մարքս, Կապիտալ, հ. 3, մաս 1-ին, Երևան, 1947, էջ 430: